

Ruth Schmitt
Bei de Woiläs

Schun als Kind ging ich mit in die Trauweläs -
un bin sehr gern debei gewäs,
bei de Tante Greta un dem Ungel Schaa.
Ich hatt e Aamerche un e Scherche ganz klaa...

Bin in de Wingertsreihe erumgehippt,
hun hie un do en Trauweberkel abgeschnippt.
Die Tante sprach: „Mach mit dere Scher kaa Dinger -
vor allem awwer: schneid der net in de Finger!“

E ganz Zeit lang ging das aach gut -
uff amol lief ausem Finger Blut!
Die Wund hot wie verrickt gebrennt,
do hun ich gejammert un geflennt.

Mer hot mich getröscht, hot gesaat: „Kumm,
ich mach der doi Sackdudch drummerum.“
Laad war ich jetz des Trauweschneide,
moi Trauwescherche tat ich meide;

machte mich dann wirrer ganz froh
an des Trauwe-Esse dro.
De Ungel Schaa sprach: „Sei net mied
un sing uns jetz emol e Lied!

Wer singt, machts Meilche uff un zu
un lässt die Trauweberkel in Ruh...“
A l l e Berkel hun domols gezählt - 's war kaan Spass! -
denn jeder Trobbe devun fehlte hinneno im Fass.

Schee wars immer, ich werds net vegesse,
debei warn aach unser Vewandte aus Owwerhesse,
die schenkte sich de Woi aus em Kriggelche aus;
un Vögelchesbrot gabs in de Mittagspaus.

Als ich älter war, hot das annerscht ausgesieh:
in die Wingertsreih musst mer sich ordne irgendwie,
Schnelligkeit beweise – hopp hopp ! -
de Boppes no owwe, no unne de Kopp.

Im Wingertslaab erumgewiehl -
un noo de dorthängende Trauwe geschiehl!
„Tempo!“ hieß es, „net so lahm!“
De Aamer musst voll soi, bis de Butteträger kam.

So ging das fort in aaner Tour -
hot mer des Kreiz nemmeh gradkriet, wars fünf Uhr.
De Chef sagte „Ehr hun heit genug gemacht,
moje geht's weiter um Uhre acht.“

Bei Sunneschoi machte die Läs veel Spass,
awwer wehe wann de Daach war nass:
Die Klamotte dorchwaicht, die Schuh bleischwer -
die Herbstromantik ging bade, aus wars middem Flair.

Die gesamte fleißige Leserschar
war froh, wann endlich Feierowend war.
Zwaa bis drei Woche ging das so,
mit de Johre warn noch meh Wingert un Trauwe do,

des geplagte Kreiz musste mer stütze,
machte dann die Läs im Sitze.
E gepolschert Limokischt hot mer unnergestellt,
die Gemüter hot das uffgehell.

De Fleiß wurde dodorch net gestoppt,
mer hot Spass gemacht und Sprich gekloppt,
munter sich dorch die Reihe geschafft -
mit Humor langte dagsüwwer gut die Kraft!

Des Allerscheenschte derf ich net vegesse:
wammer geruf hot „Kummen all zum Esse!“
De Essekorb war groß un schwer,
de Inhalt alles zum Vezehr!

E ganz Stichel Läng' schaffte noch die Leserschar,
bis de volle Korb endlich ausgepackt war.
Do kam uff de gedeckte Disch
Worscht un Schinke, Käs un Fisch,

Eier, Kummern, harte Schwaatema,
e Dippe Gequellte – net so klaa!
Fürstlich konnte mer do schlemme,
vun all dene gute Sache sich nemme.

For de Dorscht gabs Kaffee, aach vum beschte Woi -
das war Ehresach, das musste so soi!
Ebbes Süßes krönte des Esse am Schluss:
en Mohrekopp odder en Neecherkuss!

De Chef hot sich net lumpe loss,
en Schnaps odder e Likörche ingegoss.
Do konnt mer werkllich nor noch staune -
so hält mer sich die Leit bei Laune!

No so eme gute un opulente Esse
wollt sich doch aaner mit eme Stareschussapparat messe...
Mit lautem Knall machte der sich Luft -
in de frisch Natur war das Abgas awwer schnell vepufft!

Ein Erlebnis war de Herbscht jed Jahr -
in Zukunft kimmt das net meh oft vor...
Maschine hun die Les üwwernumm,
Daach un Nacht hört mer dene ehr Gebrumm.

Voll sin aach dis Jahr wirrer alle Fässer,
un de Rhoihessewoi werd immer beliebter un besser:
dank dene studierte Winzerleit -
die sin all ganz prima ausgebildet heit!

Die wisse, wie mers mache muss:
vum Rebstock üwwer die Woibereitung bis hin zum Trinkgenuss